

2 CORINTIOS

San Pablopa K'art'a T'êepema P'ãda Corinto P'uurudepema Ijãapataarãmaa

San Pablo, Jesucristopa jirit'eradapa na k'art'a p'ãji. Na k'art'a p'ãk'ãri Corintodepema ijãapataarãmaa, Macedonia eujãde baji. Na k'art'a p'ãji k'awaak'ãri Corintodepema ijãapataarã t'ãide pedee k'achia jaradap'edaa iru ãpite. K'irãpapi bi ichi Cristopa jirit'erada mãik'aapa k'ĩra jĩp'a nipada ãra t'ãide jaratee nipak'ãri. Awaraa k'art'a p'ãda k'ãyaara, na k'art'ade Pablopa jĩp'a jara bi ichi t'ãridepai k'ĩsia iru bada.

Naapiara jara bi ichi chupiria nĩbada, Cristopa ooda eperãarã k'aripait'ee jarateepari k'aurepa (cap. 1.1-11). Jara bi sãap'eda audú itria pedee p'ãji ãramaa (caps. 1.12-2.4); írã sãga o-ĩa bi ãradepemapa ne-inaa k'achia oopata oo amaada perã mãik'aapa iru ãraadak'a oodap'edaa perã (cap. 2.5-17). Jara bi Ak'õrepa ãraa chiwidi jara pëida Cristo k'ap'ia pari (caps. 3.1-4.6); sãap'eda ijãapataarãpa waaweedaik'araa bi piudait'ee (caps. 4.7-5.10); sãga Ak'õrepa ichi t'ãri auk'a bipari ijãapataarã t'ãri ome (caps. 5.11-6.13) mãik'aapa Corinto p'uurudepemaarãpa ijãadap'edaa (caps. 6.14-7.16). Ma Corintodepema ijãapataarã nepirade p'anadak'ãri, k'ĩsiada-e paji awaraa ijãapataarã k'aripadait'ee. Maperã Pablopa jara bi p'arat'a p'e atadamerã tee pëidait'ee Judeadepema chupiria beerãmaa (caps. 8-9). Ma eere Pablopa p'anau

bì ichi imiateedap'edaarã. Jara bì sãga Cristopa ichi jirit'eraji mãik'aapa sãap'eda Corintodepema ijãapataarãpa iru ũraa ũridaipia bì, ãchi t'ãidepema seewa jarateepataarã ũridai k'ãyaara (caps. 10.1–13.10). T'ëepai jara bì ichia k'inia bì ãra k'ãiwee, chik'inia p'anapataadamerã (cap. 13.11-14).

Salude pëida

¹ Mi, Pablopa na k'art'a p'ã pëiru Jesucristode ijãapataarãmaa, Corinto p'uurude p'ani mãik'aapa jõma Acaya eujãde p'ani. Tachi ñpema Cristo k'aurepa, Timoteopa ichiaba salude pëiru parãmaa. Tachi Ak'õrepa k'inia bada perã, mi jirit'eraji Jesucristopa mi pëimerã jarateede ichia oopi k'inia bì eperãarãmaa.

² Mapa mia k'inia bì Tachi Ak'õrepa Tachi Waibia Jesucristo ome parã pia ak'i p'anadamerã. Mãgã parã k'ãiwee p'anapataadait'ee.

Tachi Ak'õrepa Cristode ijãapataarã k'aripapari

³ ¡Wãara, Tachi Ak'õre, Tachi Waibia Jesucristo Ak'õre, jõmaarã k'ãyaara waibiaara bì! Ichia tachi chupiria k'awaapari mãik'aapa ichiata tachi t'ãri o-ñapipari.

⁴ Mãgã oopari tai jarateepataarãmaa, chupiria jõnide. Ichia tai mãgã k'aripapari, taipa, jõdee, awaraarã auk'a k'aripadamerã ãra chupiria jõnadak'ãri.

⁵ Eperãarã ũk'uruurãpa Cristo k'ĩra unuamaa iru p'anajida irua jarada k'aurepa. Mãgã ñrá awaraarãpa tai auk'a k'ĩra unuamaa iru p'ani taipa jarateepata k'aurepa. Mamãda Cristopa tai

k'aripapari choodamerã. Waapiara ãchia tai mãga iru p'ani pirã, waapiara Cristopa tai t'ãri o-ïapiit'ee.

⁶ Wãara, chupiria jõneeruta pijida Cristopa jarada jarateepata k'aurepa parãmaa, tai o-ïa p'ani. Tai mãgã p'anadai ma jarateepata k'aurepa parã o k'achiadeepa uchiadap'edaa perã. Ma awara Tachi Ak'õrepa tai t'ãri o-ïapi bik'a chupiria jõnide, auk'a parã t'ãri o-ïapiit'ee parã auk'a chupiria jõneedak'ãri. Irua mãga ooit'ee parãpa choodak'ãri taipa choopatak'a.

⁷ Maperã taipa k'awa p'ani Tachi Ak'õrepa tai k'aripaparik'a chupiria jõnide, parã auk'a k'aripait'ee mãgã jõnadak'ãri.

⁸ Ipemaarã, parãmaa mia k'irãpapi k'inia bi mi chupiria nĩbada Ásia eujãde. Mãga nĩbak'ãri, perã choo-e paji. T'ãri ma-ãri nĩbaji.

⁹ Wãara, k'ĩsijai madeepa chok'ai uchiae pai. Mamĩda ĩrã k'awa bi mãga paji mia ijãanaamerã michi k'ĩradoopa chupiria nĩbideepa uchiai. Jĩp'a Tachi Ak'õrẽpata uchiapii. Ichia mãgã k'aripai ichi jõmaarã k'ãyaara waibiara bairã. ¡Irua aupaita piudap'edaarã chok'ai p'irabaipipari!

¹⁰ Wãara, mi piudak'a baji. Mamĩda Ak'õrepa mi k'aripa ataji madeepa. Mapa mia k'awa bi waya mãgadaru pirã, waya mi k'aripait'ee, mi k'õp'ãyoorã jida auk'a.

¹¹ Parãpa ichiaba tai k'aripadai, it'aa t'ĩruta pirã tai pari. Mãga ooruta pirã, chok'araarãpa o-ïa gracias jaradait'ee Tachi Ak'õremaa, unudak'ãri irua ne-inaa pia ooru tai k'aripait'ee parãpa it'aa t'ĩpata k'aurepa.

Pablo p'oyaa wã-e pada Corinto pidaarã ak'ide

12 Parādepema ũk'uruurāpa jara p'ani taipa eperāarā k'ūra nipapata. Mamīda māga-e. Tai o-ia p'ani jōmaarā t'āide jaratee nipadak'āri, k'ira jīp'a nipapata perā. Māgá nipajida parā t'āide. Audua nipadak'aa paji parāpa k'īsiadamerā tai k'īsia k'awaara p'ani awaraarā k'āyaara. Māga-e. Parā t'āide t'āri pia p'anapachida, Tachi Ak'ōrepa tai k'aripa bada perā. Māga ooji ichia tai k'inia iru bapari perā.

13 Taipa parāmaa k'art'a p'ā pēidak'āri, jīp'a p'āpata taipa jara k'inia p'ani aupai. Māgá p'āpata parāpa tai k'art'a leedamerā māik'aapa pia k'awaadamerā jōmaweda aide jara bi.

14 Wāara parādepema ũk'uruurāpa māga k'awapata. Mamīda mia k'inia bi parā jōmaarāpa k'awa k'inia p'anadamerā taipa oopata māik'aapa jarateepata. Māgá Tachi Waibia Jesús waya chek'āri, tachi jōma o-ia p'anadait'ee iru k'īrapite. Tai o-ia p'anadait'ee parāpa taipa jarateeda ijāadap'edaa perā. Jōdee parā o-ia p'anadait'ee tai it'aideepa ũridap'edaa perā Cristopa ooda eperāarā k'aripait'ee.

15 Mia k'īsiaji parāpa pedeejida taipa k'art'a p'ā pēidap'edaa māik'aapa ijāajida wāara Cristopa tai pēiji jarateedamerā irua oopi k'inia bi eperāarāmaa. Mapa wāit'ee paji parā ak'ide. Wāda omé wāit'ee paji parā o-ia p'anadamerā mi unudak'āri.

16 Naapiara Macedonia eujādee wāk'āri, mi parāmāi wiibaiit'ee paji māik'aapa waya āpītee chek'āri, auk'a parāmaa p'asianait'ee paji. Ma t'ēe wādade parāpa mi k'aripak'ajida Judea eujādee wāit'ee.

17 Mamĩda parãpa k'awa p'ani mi parãmaa wã-e paji. ¿Mapa parã t'ãidepema ũk'uruurãpa jara p'ani-ek'ã mi t'ãri auk'a bi-e parã ome? ¿K'ĩsia p'ani-ek'ã michia oo k'iniata oopari awaraarãpa oopatak'a? ¡Mia mãga ook'aapi!

18 Tachi Ak'õrẽpata k'awa bi tai jarateepataarã mãgá p'anadak'aa. Ichiaba mãgá jarateedak'aa, jarateedak'ãri iru Warra, Jesucristopa ooda eperãarã k'aripait'ee. Jĩp'a taimaa jarateepata irua jarapi bik'a. Tachi Ak'õrepa ichita oopari ichia jara bik'a. Mãga oopata tai jida ichiaba, ichideerã perã.

19 Parã t'ãide Silvano, Timoteo mi ome jarateedak'ãri Jesucristo Tachi Ak'õre Warra, tai k'ĩsiadoopapai jarateedak'aa paji. Jĩp'a jarateepachida Tachi Ak'õrepa taimaa jarapidak'a. Jesucristo mãgá bapachi. Ichita ooji ichi ak'õrepa jaradak'a.

20 Chonaarãweda Tachi Ak'õrepa jaraji Jesucristopa ooit'ee bada. Mãga jaraji Cristo t'oi naaweda. Mãpai iru t'op'eda, wãara ooji jõmaweda Ak'õrepa jaradak'a. Maperã k'awa p'ani Cristo wãara Tachi Waibia. Mãgá Cristode ijãapata perã, tachia “Amén” apata Tachi Ak'õre Ũraa ũridak'ãri.

21 Tachi Ak'õrẽpata tai Cristode ijãapipari, parã jida auk'a. Ichiata tachi jirit'eraji ichideerã papiit'ee.

22 Tachia k'awaadamerã wãara ichideerã p'ani, ichia tauchaa pik'a biji tachi t'ãride. Ichi Jaure pẽiji tachi ijãapataarã ome bapariimerã. Mãga ook'ãri, tachimaa ak'ipiji ichia wãara tachi pia ak'it'ee mãik'aapa t'ẽepai teet'ee jõmaweda ichia k'ĩsia iru bi tachi-it'ee.

Pablopa jarada sãap'eda wã-e paji Corintodepema ijãapataarã ak'ide

²³ Ak'õre k'ĩrapite mia jara k'inia bi sãap'edata wã-e paji parã ak'ide. Tachi Ak'õrepa k'awa bi michi t'ãride iru bi mãik'aapa mi miapii seewa jararu pirã. Mi waa wã-e paji Corinto p'uurudee parã itriade, parã t'ãri p'uapiamaapa.

²⁴ Tai, chi jarateepataarãpa, parãmaa ijãapi k'iniada-e taipa k'inia p'anik'a. Parãpa auk'a Cristode ijãapata. Iruata parãmaa ichia k'inia bik'a oopii. Taipa jõdee parã k'aripa k'inia p'ani waapiara ijãapataadamerã mãik'aapa t'ãri o-ia p'anapataadamerã.

2

¹ Naaweda mi parã ak'ide wãk'ãri, parã t'ãri p'uapiji. Maperã waya wãit'ee pak'ãri, nãga k'ĩsiai: "Mi naapai waya wã-e ãra t'ãri p'uapide."

² Mia parã t'ãri p'uapiru pirã, parãdepema apida wẽ-e pai mi t'ãri o-ĩapiit'ee.

³ Mapa wãi k'ãyaara, k'art'a p'ã pëiji parãpa aide jara bi ũridamerã mãik'aapa oodamerã mia ũraadak'a. Mi parãmaa wãru pirã parãpa mãga oodai naaweda, audupiara parã t'ãri p'uapii. Waya unudak'ãri, mia k'inia bi parãpa mi t'ãri p'uapii k'ãyaara, t'ãri o-ĩapidamerã. Mia nãga k'awa bi: mi t'ãri o-ia bak'ãri, parã jida mãga p'ani.

⁴ Ma k'art'a p'ãk'ãri, michi t'ãride k'ĩsia nĩbaji, parã mãgã itria k'inia-e pada perã. Jëedachi parã t'ãri p'uapi k'inia-e bada perã. Ma k'art'a p'ãk'ãri, mia jĩp'a ak'ipi k'inia baji parã audú k'inia iru bi.

Pablopa ũraada perdonaa k'awaadamerã

5 Wāara parā t'āidepemapa, k'achia oo k'iniapa, mi t'āri p'uapiji māik'aapa parā ũk'uru audupɪara māgapiji. Ichia tachimaa māgá ooji mīda, mia iru waa imiatee k'inia-e.

6 Parā chok'araarāpa iru t'āri p'uapimaa p'ani, iru yiaraa iru p'anadairā. Jāgapaiɪ. Waa māgá yiaraa iru p'anadaik'araa bi.

7 Ma k'āyaara, irua ooda perdonaadaipia bi māik'aapa t'āri o-īapidaipia bi waya t'īumerā awaraa ijāapataarā ome. Parāpa māga ooda-e pɪrā māik'aapa iru at'āri yiaraa iru p'anaruta pɪrā, iru audupɪara t'āri p'ua bai, Ak'ōrede ijāa-edarumaa.

8 Maperā ĩrá mia parāmaa enenee nībi ak'ipidamerā wāara iru k'inia iru p'ani.

9 Ma-it'ee ma k'art'a p'āji. K'inia baji irua ma k'achia oo amaamerā. Mamīda ma k'āyaara waapɪara mia k'awa k'inia baji parāpa oodai wa ooda-e pai mia jaradak'a.

10 Parāpa ma eperāpa k'achia ooda perdonaa p'anik'a, mia pida perdonaa bi. Wāara, Cristopa k'awa bi abaapa mi ome nepɪra jiri baji pɪrā, mia ma nepɪra perdonaaaji. Mia māga ooji parā waya t'āri o-īa p'anadamerā.

11 Tachi jōmaarāpa chīarapa k'achia ooda māgá perdonaaruta pɪrā, Netuara Poro Waibia juade baaida-e pait'ee ne-inaa k'achia oo k'iniapa ma eperāmaa. Ma awara ma ne-inaa k'achia ooda k'aurepa netuara juade baai-e pait'ee, audú k'ĭsia p'ua nībairā. Tachia pia k'awa p'ani netuarapa oopari ichi juade baaidamerā.

Pablo Troas p'uurude nipada

12 Mia jaradak'a mi wã-e paji parã ak'ide. Ma k'ãyaara Troas p'uurudee wãji jarateede. Mama nipak'ãri, Tachi Waibiapa k'aripaji mãpemaarãpa ũri k'inia p'anadamerã Cristopa ooda eperãarã k'aripait'ee.

13 Mamãda, mama bide mi k'ĩsia nĩbeeji unu-e pada perã Tito, tachi ïpema Cristo k'aurepa, mia pëida parã ak'ide. Iru parãmãiipa chep'eda, mama tai unudait'ee paji. Mãgã unuda-e pada perã, mia Troadepemaarã atabëiji mãik'aapa cheji Macedonia eujãdee, nama Tito ome unui jãak'aapa.

Pablopa jarada Titopa nepirida ũrip'eda

14 Taipa gracias jarapata Tachi Ak'õremaa, iru-ata Netuara Poro Waibia p'oyaapari perã Cristo juapa. Maperãpi netuara apidaapa tai Cristodeerã p'oyaada-e pai. Mãgã ichideerã perã irua tai k'aripapari jarateedamerã jõmaarã t'ãide.

15 Ara k'era t'ũa aubaiparik'a ewat'aak'ãri, mãga pik'a tai ijãapataarã t'imí wãpata jarateede Cristopa oopi k'inia bi eperãarãmaa. Tachi Ak'õrepa unuk'ãri taipa mãga jarateemaa p'ani, o-ĩa beepari. Cristopa tai jarateepataarã pëipari jarateedamerã chi ũri k'inia p'anĩrãmaa mãik'aapa chi ũridaamaa p'anĩrãmaa paara.

16 Taipa jarateepata mik'ia pik'a bi chi ũridaamaa p'anĩrã-it'ee, ma k'aurepa ãra atuadait'ee perã. Mamãda chi ũri k'inia p'anĩrã-it'ee ne-inaa t'ũa baparik'a bi, ma jarateeda k'aurepa ãra wãdait'ee perã Ak'õre truadee. Mãga bita, ¿k'aipa jarateeima chi ũri p'anĩrãpa wãara k'awaadamerã Cristopa oopi k'inia bi eperãarãmaa?

17 Táipata mǎga jarateedai. Ma-it'ee Tachi Ak'õrepa tai jirit'eraji. Tai k'ĩsiadoopa jarateedak'aa. Tachi Ak'õrepa ichi ũraa taimaa jarapipari. Tai nipadak'aa awaraarāk'a. Āchi k'ĩsiadoopa Ak'õre net'aa jaratee nipapata, eperāarāpa āchi pia ak'idamerā mǎik'aapa āchimaa p'arat'a teedamerā. Taipa jōdee mǎga oodak'aa. Tachi Ak'õrepa tai ichita ak'ipari perā, k'ĩra jīp'a jarateepata irua oopi bik'a. Mǎgá jarateedai Cristo tai ome bapari perā.

3

Tachi Ak'õrepa ũraa chiwidi Pablomaa k'awapida

¹ Mia jarak'āri tai k'ĩra jīp'a jarateepata, jara k'inia-e bi taita pipiara ak'idaipia bi awaraa jarateepataarā k'āyaara. Taipa k'art'a p'āda iididak'aa ijāapataarāpa parāmaa jara pēidamerā táipata pia jarateepata, jarateepataarā ũk'uruurāpa oopatak'a. Ichiaba iidida-e parāpa mǎgee k'art'a awaraa ijāapataarāmaa pēidamerā.

² Awaraarāpa k'awa k'inia p'ani pirā tai wāara Jesucristopa pēida jarateede wa mǎga-e, āchia parā ijāapataarā ak'idaipia bi. Parā taipa k'art'a p'ādák'ata p'ani, Cristode ijāapata perā taipa jarateedap'edaa k'aurepa. Michi t'āride k'awa bi mia wāarata jara bi.

³ Jōmaarāpa k'awaadai Cristopa tai pēiji parā ak'idak'āri, sāga p'anapata Cristode ijāadak'āriipa. Awaraarāpa oo k'inia p'anapata Tachi Ak'õre ũraa mǎude p'ādade jara bik'a. Tachi Ak'õrepa k'inia-e baji mǎida eperāarāpa ichita ijāadamerā ma ũraa Moisemaa p'āpidade, ũk'uru aide at'āri ijāa p'ani.

Mamĩda parã m̃ga p'anadak'aa. Ma k'ãyaara pipiara parãpa oo k'inia p'ani Cristopa oopi bik'a, Tachi Ak'õre Jaure parã t'ãride bapari perã. Ma awara Ak'õrepa m̃ga ichita oopiit'ee, ichita bapari perã.

⁴ Taipa ak'idak'ãri parãpa oomaa p'ani Cristopa oopi bik'a, k'awa p'ani wãara Tachi Ak'õrepa taimaa jarapi baji.

⁵ Tai k'ĩsiadoopa eperãarã p'oyaa Cristode ijãapidak'aa. Tachi Ak'õrepapai m̃ga ooi. Ichia aupaita tai k'aripapari iru ũraa pia jarateedamerã.

⁶ Ichia taimaa nãgí ũraa chiwidi k'awapiji. Cristopa p'ek'au k'achia oopataarã o k'achiadeepa k'aripa atai. M̃ga k'awapiji taipa jõmaarãmaa jarateenadamerã. Na ũraa chiwidi awara bi chi naawedapema ũraa k'ãyaara. Eperãarãpa ma naawedapema ũraa p'ãdade ijãaruta pirã, atuadait'ee. Jõdee na ũraa chiwidide ijãaruta pirã, Ak'õre Jaurepa ãchi Ak'õre ode t'ĩupiit'ee.

Ũraa chiwidi piara bi naawedapema ũraa k'ãyaara

⁷ K'ĩsiadama nãgide. Chonaarãweda Tachi Ak'õrepa ichi ũraa mãude p'ãpiji Moisemaa. Na eujãde bi misa, Moisés Tachi Ak'õre ome unuk'ãri, Tachi Ak'õre k'ĩra wãree iru ome beeji. Mapa Moisés waya chek'ãri Israel pidaarãmaa, ãrapa iru k'ĩra p'oyaa ak'idak'aa paji, audú ĩdaa bada perã. M̃ga baji mĩda, taarã-e nide ma ĩdaa wẽpa wãji. Ak'õrepa ichi k'ĩra wãree m̃gá ãchimaa unupiji mĩda, ma ũraa p'ãda k'aurepa eperãarãpa k'awaa p'aneejida ãchia p'ek'au k'achia oopata k'aurepa atuadait'ee.

⁸ Írá jōdee, ma k'āyaara pipiara Tachi Ak'ōrepa ũraa chiwidi jara pēida k'aurepa tachi ijāapataarāpa k'awapata Cristode ijāadak'āri, wā dai Tachi Ak'ōre truadee. Māga k'awapata Ak'ōre Jaure k'aurepa, iru tachi ome bapari perā.

⁹ Māpai nāga jaradai. Pia baji Tachi Ak'ōrepa eperāarāmaa k'awapik'āri ichi ũraa p'āda, māgide jaraji mīda āchi atuadait'ee p'ek'au k'achia oopata perā. Mamīda ma k'āyaara pipiara bi ichia ũraa chiwidi jara pēida. Māgí ũraade ichi Jaurepa tachi ijāapataarāmaa k'awapipari Cristo k'aurepa tachi p'ek'au k'achia wēe p'aní Ak'ōre k'īrapite.

¹⁰ Maperāpi k'awa p'aní pipiara bi ijāadait'ee Tachi Ak'ōrepa ũraa chiwidi jara pēidade, ijāadai k'āyaara māgí chonaarāwedapema ũraa p'ādade jara bide.

¹¹ Wāara Ak'ōre Ũraa p'āda pia baji, Ak'ōrepa māgí jarada perā. Mamīda ichia k'inia-e paji eperāarāpa ichita aide ijāadamerā. Mapa ũraa chiwidi jara pēiji. Nāgí ũraa pipiara bi chi naawedapema k'āyaara, jōk'aa perā.

¹² K'awa p'anadairā Ak'ōrepa ũraa chiwidi jara pēida māgá pipiara bi chi naawedapema jarada k'āyaara, taipa māgí ũraa jīp'a jarateepata, waaweeda-ee.

¹³ Mamīda māga-e paji Moisés ome. Moisepa ichi k'īra wāk'aji Israel pidaarāpa ununaadamerā Tachi Ak'ōre k'īra wāree wēpa wāk'āri. Māgá ma ídaa Moisés k'īrade wēpa wādak'a, ma chonaarāwedapema ũraa wēpa pik'a wāji.

¹⁴ Mamīda ma Israel pidaarāpa māga ijāa k'iniada-e paji, k'īri k'isua p'anadap'edaa perā.

At'āri māga p'ani Moisepa p'āda leepataarā ūridak'āri. Moisepa ichi k'ira wāk'a iru badak'a, āchi t'āri wāk'a pik'a iru p'ani ūraa chiwidide ijāa k'iniada-e p'anadairā. At'āri āchia ijāapata Ak'ōre ode t'īudai ma chonaarāwedapema ūraa p'ādade jara bik'a oo p'anipa. Māga ijāapata Tachi Ak'ōrepa āchimaā ichi ūraa chiwidi k'awapi bi mīda. Nāgá k'īsia awara k'īsiadai: Cristode ijāadak'āri māik'aapa ichideerā padaidak'āri.

¹⁵ Māgá Ak'ōre Ūraa Moisepa p'ādade ijāapata perā, idi ewate at'āri ma ūraa ūridak'āri, āchi t'āri wāk'a pik'a iru p'ani.

¹⁶ Mamīda āchidepemapa ma ūraa chiwidi ūrik'āri māik'aapa Cristode ijāak'āri, ma t'āri wāk'a pik'a bada wēpait'ee.

¹⁷ Māga p'aneedait'ee Cristode ijāadak'āri, eperāarā uchiapata perā Ak'ōrepa naawedapema ūraa p'āda jua ek'ariipa. Māga oodai Cristo āra ome bapari perā ichi Jaure k'ap'ia pari. Cristo ichi Jaure ome apai, auk'a Tachi Waibia perā.

¹⁸ Māgá ma naawedapema ūraa jua ek'ariipa tachi uchiadap'edaa perā, tachi t'āri waa wāk'a pik'a p'ani-e. Ara espejode tachi k'ira unuparik'a, māga pik'a Tachi Ak'ōre k'ira wāree unupata iru ūraa chiwidi jara pēidade Cristo k'ap'ia pari. Ma awara Cristo Jaurepa oopi bik'a oodak'āri, t'āri pia padaipata iruk'a. Waapiara iru Jaurepa oopi bik'a oodai, waapiara t'āri pia padaridai iruk'a.

4

Pablopa pedee pia jarateeda

1 Tachi Ak'õrepa tai chupiria k'awaa bairã, ichi ùraa chiwidi taimaa jaratepi bi. Maperãpi waaweeda-ee p'anapata, awaraarãpa tai ome nepira jiri p'ani mĩda.

2 Taipa oodaamaa p'anapata ne-inaa k'achia awaraarãpa mera oopata; ne-inaa eperãarã jĩp'arã k'ĩra nejasia p'anapata oodait'ee. Madepema ùk'uruurãpa imeraa jarateepata chĩara k'ùradait'ee. Maa-e pirã ãchi k'ĩsia p'oirapata Ak'õrepa jarapi bi ome, irua jara k'inia bi awara uchiamerã. Mamĩda taipa mãga ooda-e. Ak'õrepa wãarata jara pẽida k'ĩra jĩp'a jarateepata. Mãga oo p'anipa k'inia p'ani jõmaarãpa k'awaadamerã Tachi Ak'õre k'ĩrapite taipa wãarata jarateepata.

3 Wãara, Cristopa ooda eperãarã k'aripait'ee jarateedak'ãri, ùk'uru eperãarã-it'ee ma jarateepata wãk'a pik'a bi, mãirãpa ma wãarata k'awadaamaa p'anapata perã. Mapa o k'achiadee wãruta.

4 Æchi mãga p'ani na p'ek'au eujãdepema ijãadak'aa beerã ak'õre, Netuara Poro Waibiapa, ãchi tau p'ãriu pik'a iru bairã ichi jua ek'ari. Ichia k'inia-e ãchia k'awaadamerã t'ĩudai ìdaa pik'a bide k'awaadak'ãri Cristopa ooda ãchi o k'achiadeepa k'aripa atait'ee. Ichia k'awa bi mãga ijãaruta pirã, unudai Cristo k'ĩra wãree, iru Tachi Ak'õre k'ĩrak'a bairã.

5 Mapa taipa jarateedak'ãri, jarateeda-e tachi k'ĩsiadeepa tai ak'idamerã pãchi poroorãk'a. Jĩp'a jarateepata Jesucristo, Tachi Waibiapa oopi k'inia bi eperãarãmaa. Taipa irua oopi bik'a oo k'inia p'anapata perã, tai mimiapata parã-it'ee.

6 K'awa p'ani Jesucristo tachi jõmaarã waibia nãga perã. Ewaa weda jõma p'ãriu nĩbak'ãri,

Tachi Ak'õrepa jaraji ñdaamerã. Mãpai ñdaa beeji. Mãga pik'a ijãadai naaweda, tai p'ãriu pik'a bide p'anapachida, k'awada-e p'anadap'edaa perã Cristopa ooda eperãarã k'aripait'ee. Mamĩda Tachi Ak'õrepa taimaa mãga k'awapik'ãri, tai t'ãride ñdaa pik'apiji. Mapa Cristode ijãa p'aneejida mãik'aapa k'awaa p'aneejida Tachi Ak'õre k'ĩra wãree.

Tachi Ak'õrepa wãarata jarateepataarã k'aripapari

⁷ Tachi k'ap'ia chok'o sorek'api bi. Mamĩda Tachi Ak'õrepa aide nẽe bidák'api bi ichi k'ĩra wãree taimaa unupik'ãri mãik'aapa tai jirit'erak'ãri Cristopa ooda jarateedamerã eperãarã k'aripait'ee. Mãgã eperãarãpa ijãadak'ãri taipa jarateepata k'aurepa, jõmaarãpa k'awaadai Tachi Ak'õrépata taimaa jarapi bi. ¡Iruta tai k'ãyaara waibiara bi!

⁸ Mãga jaratee p'ani misa iru-it'ee, tai wãrutamaa ijãadak'aa beerãpa nepira jiripata tai ome. Mamĩda ãramaa p'oyaapidak'aa. Mãga p'anadai Tachi Ak'õrépata tai k'aripapari perã choodamerã. Edaare k'awada-e sãgapi oodai. Mamĩda ijãa p'ani Ak'õrepa taimaa ichia k'inia bi k'awapiit'ee.

⁹ Edaare awaraarãpa tai k'ĩra unuamaa iru p'anapata. Mamĩda Tachi Ak'õrepa tai atabaibëik'aa. Ichiaba edaare tai p'ua oopata. Mamĩda Tachi Ak'õrepa tai k'aripapari chok'ai uchiadamerã ãchi juadeepa.

¹⁰ Tai wãrutamaa jiripata peedait'ee Jesús peedap'edaak'a. Mamĩda Tachi Ak'õrepa tai k'aripapari ãchi juadeepa, eperãarãpa

k'awaadamerã irua aupaita tai k'aripapari. Mãga oopari Jesucristo Jaure tai ome bapari perã.

¹¹ Wãara, na p'ek'au eujãde p'ani misa, tai mãgá pee k'inia p'anadait'ee taipa jarateepata perã Jesucristopa oopi k'inia bi eperãarãmaa. Mamãda mãga p'oyaa ooda-e, irua ak'ipi k'inia bairã ichi wãara chok'ai p'irabaiji mãik'aapa at'ãri tai t'ãride chok'ai bi.

¹² Mãpai tai mãgá jiri p'ani mãda, taipa jarateepata Ak'õrepa jarapi bik'a, parã awaraarã ome Cristode ijãadap'eda, Tachi Ak'õre truade ichita p'anapataadamerã.

¹³ Taipa auk'a jaradai Tachi Ak'õre chonaarãwedapema ùraa p'ãdade jara bik'a: 'Ijãaji Tachi Ak'õrepa mi k'aripai. Maperã irumaa jaraji michi t'ãride k'isia bada.' (*Sal 116.10*) Taipa ichiaba mãga ijãapata. Maperãpi jarateepata Tachi Ak'õrepa jarapi bik'a.

¹⁴ K'awa p'ani Tachi Ak'õrepa Jesucristo chok'ai p'irabaipidak'a, tai jida auk'a p'irabaipiit'ee parã ome mãik'aapa tachi ateeit'ee Jesucristo bimaai ichi truade. Mãga ooit'ee tachi Cristodeerã perã.

¹⁵ Mãga k'awa p'anadairã, choopata parã mãik'aapa awaraarã k'aripadait'ee Cristode ijãadamerã. Mãgá chok'araarãpa k'awaadait'ee Ak'õrepa ãchi k'inia iru bi mãik'aapa o k'achiadeepa uchiapi k'inia bi. Mãpai mãirãpa Cristode ijãadak'ãri, gracias jaradait'ee Tachi Ak'õremaa mãik'aapa ãchi it'aa t'ĩ p'anide ak'ipidait'ee wãara irude ijãapata.

¹⁶ Maperãpi tai chupiria jõneedak'ãri, k'isia p'ua jõnadak'aa. Tai k'ap'ia jõdaruta pijida, ewari chaa t'ãride audupiarã Tachi Ak'õrede ijãapata.

17 Ma awara na eujãde p'ani misa, taarãdak'aa chupiria jõnide. Tai-it'ee mak'iaara p'ua-e. Jõdee taipa ne-inaa unudait'ee Tachi Ak'õre truade p'oyaa jarada-e, audú pi-ia bairã. Ichita p'anapataadait'ee iru ome!

18 Maperã tai audú k'isia jõnada-e na p'ek'au eujãde unu p'ani k'aurepa. Jip'a k'isiapata ne-inaa waide unuda-e p'anide; it'aripema net'aade. Na eujãdepema net'aa taarã-ee jõpari. Mamida it'aripema net'aa ichita bapariit'ee.

5

*Ijãapataarã it'aripema k'ap'ia chiwidide
p'anapataadait'ee
(1 Co 15.35-58)*

1 Taipa k'awa p'ani tachi eperã k'ap'ia piuru pijida Cristo chei naaweda, Tachi Ak'õrepa tai p'anapiit'ee ichia ooit'ee bi it'aripema k'ap'ia chiwidide. Na p'ek'au eujãdepema k'ap'ia jõpari. Mamida chi it'aripema k'ap'ia jõk'aa, Tachi Ak'õrepa mǎgá oopari perã.

2 Na p'ek'au eujãdepema k'ap'iade p'ani misa, chupiria jõnapata mǎik'aapa audú k'isia jõnapata, ma it'aripema k'ap'iade p'ana k'inia p'anadairã.

3 Eperãpa p'aru jĩ k'inia bik'a, mǎga pik'a tai p'ana k'inia p'ani ma it'aripema k'ap'iade. Eperã ãk'adaa ba k'inia-e bik'a, tai k'ap'ia wēe p'ana k'iniadak'aa.

4 Maperãpi piu k'iniada-e Cristo chei naaweda. Iru mǎgá cheru misa, na p'ek'au eujãdepema k'ap'iade p'anide, k'isia jõnapata ne-inaa k'achia p'asai jĩak'aapa. Mǎgá na p'ek'au eujãdepema k'ap'ia

chupiria n̄ibairã, atabēi k'inia p'ani Tachi Ak'õre ome p'ananadait'ee.

⁵ Ma-it'ee Tachi Ak'õrepa it'aripema k'ap'ia ooit'ee ichideerã-it'ee, aide p'anapataadamerã iru truade. Mãga k'awa p'ani irua ichi Jaure p̄ida perã tachi chaachaa bapariimerã. Ichi Jaurepata k'awapipari ichia k'isia iru bi ichideerã-it'ee.

⁶ Tachi Ak'õrepa mágá ne-inaa k'isia iru bapari perã ichideerã-it'ee, na p'ek'au eujãde p'ani misa, tachi k'ãiwee p'anapataadai. Wãara k'awa p'ani na p'ek'au eujãdepema k'ap'iade p'ani misa, Tachi Waibia ik'aawaapa t'imí pik'a p'ani.

⁷ Tachi taupa iru unuda-e p'ani m̄ida, irude ijãapata.

⁸ Maperãpi k'ãiwee p'anapata. Piara bak'aji aweda uchiadait'ee na p'ek'au eujãdepema k'ap'iadeepa m̄aik'aapa iru truade p'ananadait'ee tachi it'aripema k'ap'iade.

⁹ Mam̄ida at'ãri wãda-e. Mapa nãga k'isiapata. Na p'ek'au eujãdepema k'ap'iade p'ani misa, oo k'inia p'ani Cristopa oopi bik'a m̄aik'aapa na eujãdeepa uchiadak'ãri, auk'a oo k'inia p'anadait'ee irua oopi bik'a nãga perã.

¹⁰ Ewari cherude tachi ijãapataarã j̄omaweda iru k'irapite panadait'ee irua ak'imerã tachia oopatap'edaa na p'ek'au eujãde p'ani misa. Eperã Cristopa oopi k'inia bik'a oodapa atait'ee Tachi Ak'õrepa ne-inaa k'isia iru bi ichideerã-it'ee. Ma awara Cristopa m̄agimaa pedee pia jarait'ee. Mam̄ida chi m̄aga oo-e badapa maarepida ata-e pait'ee m̄aik'aapa Cristopa irumaa pedee pia jara-e pait'ee.

*Cristo k'aurepa Tachi Ak'õre k'awadai
(Ro 5.9-11; Col 1.19-22)*

¹¹ Cristopa tachia oopata mǎgá ak'it'ee perǎ, iru waawee p'anapata. Mapa taipa eperǎarǎmaa jarateepata Cristode ijǎadamerǎ mǎik'aapa tai p'anapata k'awaadamerǎ. Taipa ne-inaa oodak'ǎri wa ne-inaa jaradak'ǎri, mǎga oopata eperǎarǎ k'aripadait'ee. Tachi Ak'õrepa k'awa bi tai t'ǎride iru p'ani. Mia k'inia bi parǎpa tai ichiaba mǎgá k'awaadamerǎ.

¹² Mia mǎga jarak'ǎri, jara k'inia-e bi tai pipiara ak'idamerǎ awaraarǎ k'ǎyaara. Jip'a k'inia bi parǎ o-ǎ p'anadamerǎ taipa ne-inaa pia oopata k'aurepa. Mǎgá o-ǎ p'anaruta pirǎ, parǎpa p'anaudai chi audua beerǎpa tai ǎpǎte jara jõni. Ma jarateepataarǎpa k'ĩsiapata ǎchia aupaita pia jarateepata.

¹³ ¿Mǎirǎpa jara p'ani-ek'ǎ tai parǎ t'ǎide nipadak'ǎri, oojida k'ĩra k'awa-ee p'anirǎpa oopatak'a? Mamĩda mǎga-e paji. Taipa mǎga oojida awaraarǎpa unudak'ǎri, k'awaadamerǎ Tachi Ak'õre jõmaarǎ waibia. Ma awara tai k'ĩra jip'a nipadak'ǎri, mǎga oopata parǎ k'aripadait'ee, auk'a Tachi Ak'õre pipiara k'awaadamerǎ.

¹⁴ Jesucristopa tai k'inia iru bapari. Maperǎpi tai jaratee nipapata irua oopi k'inia bik'a. Wǎara na p'ek'au eujǎdepemaarǎ jõmaweda k'inia iru bapari perǎ, kurusode piuji tachia p'ek'au k'achia oopata k'aurepa. Mǎgá piuji jõmaarǎ k'ap'ia pari. Ara Cristo piudak'a jõmaarǎ pari, iru k'ap'ia pari eperǎ chaachaa piu pik'aji.

¹⁵ Cristo piuji eperǎarǎ pari mǎik'aapa chok'ai p'irabaiji, k'inia bada perǎ ichide ijǎa p'anirǎ

p'anapataadamerã irua k'inia bik'a. Tachi mãga p'anadak'ãri, oodait'ee irua oopi k'inia bik'a, tachia oo k'iniata oodai k'ãyaara.

16 Mãga k'awaadak'ãriipa, taipa eperãarã unudak'aa, Cristode ijãadai naaweda unupatap'edaak'a. Maapai Cristo jida eperã jïp'aak'a unupachida. ¡Mamïda ãrá iru mágá unuda-e p'ani! Ichideerã ichiaba mágá unuda-e nãga perã.

17 Eperã araa bak'ãri Cristo ome ijãapari perã irude, mágí eperã t'ãri awaradaipari. ¡Pia k'ĩsĩati! Cristode ijãai naaweda, ma eperã k'achiade nipa-pachi. Mamïda irude ijãadak'ãriipa waa mágá nipa k'inia-e. Jïp'a nipa k'inia bi Cristopa oopi bik'a.

18 Mágá nipai Tachi Ak'õrepa mãga oopipari perã. Tachi auk'a p'anapachida ma eperãk'a. Cristode ijãadai naaweda, taipa Tachi Ak'õre pia k'awa k'iniada-e p'anapachida. Ichiaba maapai Tachi Ak'õrepa tachi pia-ee ak'ipachi. Mamïda ijãadak'ãri, Cristo piuda k'aurepa Tachi Ak'õrepa ichi t'ãri auk'a biji tachi t'ãri ome. Maperãpi tai jirit'eraji jõmaarãmaa jarateenadamerã. Mágá taipa jarateepata ùrirutaarãpa Cristode ijãadak'ãri, Tachi Ak'õrepa ichi t'ãri auk'a bipari ãchi t'ãri ome ichiaba.

19 Pia jarait'eera, Cristo piuda k'aurepa eperãarã pari, Tachi Ak'õrepa ichi t'ãri auk'a bi k'inia bi ãchi t'ãri ome. Ma awara ãchia p'ek'au k'achia oopata wẽpapi k'inia bi. Ma pedeeta Tachi Ak'õrepa taimaa jarapi bi.

20 Ma-it'ee Cristopa tai pëiji, ichi k'ap'ia pari taipa jaradamerã irua jara k'inia bi. Mapa taipa parã jõmaarãmaa enenee jõni: Ijãati Jesucristode,

Tachi Ak'õrepa ichi t'ãri auk'a bimerã parã t'ãri ome.

²¹ Cristopa p'ek'au k'achia maarepida ook'aa paji. Mamĩda kurusode bak'ãri tachi p'ek'au k'achia oopataarã pari, Tachi Ak'õrepa iru pia-ee unuji. P'ek'au k'achia oopataarã unuparik'a unuji. Írá jõdee, ma piuda k'aurepa Tachi Ak'õrepa tachi pia unupari.

6

¹ Mãpa tai Tachi Ak'õre ome mimia p'anide, parã ũraa k'inia p'ani k'ĩsiadamerã Tachi Ak'õrepa parãmaa pia ooda. Parã ijãadak'ãri, Cristo piuda k'aurepa Tachi Ak'õrepa ichi t'ãri auk'a bijĩ parã t'ãri ome. Maperã k'ĩrak'aupai Tachi Ak'õre yiaraa iru p'anadai awaraarãpa jarateepata ũri k'iniapa.

² Ma k'ãyaara óoti Tachi Ak'õre Ũraa p'ãdade jara bik'a:

'Mia pide k'ĩsia bak'ãri, ũriji pia mimaa it'aa iidida. Pia chupiria iidida ewate, mia pi o k'achiadeepa k'aripa ataji.' *(Is 49.8)*

Corinto pidaarã, ¡úrĩti! Nãgaweda Tachi Ak'õrepa ũriit'ee parãpa chupiria iidiruta. Nãgaweda parã k'aripait'ee ichide wãara ijãadamerã.

Pablopa ne-inaa k'achia chooda

³ Tai parã t'ãide jaratee nipadak'ãri, maarepida ne-inaa oo k'iniada-e paji parãpa ma jarateepata oo iru p'anadamerã, wa Cristode ijãadaamaa p'anadamerã taipa oopata k'aurepa.

⁴ Mãga-e. Jĩp'a oo k'inia p'anapachida jõmaweda Tachi Ak'õrepa oopidak'a, parãpa tai pia ak'idamerã, Ak'õrepa tai pia ak'iparik'a. Tai jõmaarã t'ãide mãgá nipapata. Mãimisa,

t'ãridepai choopata audú k'ĩsia jõnide; ne-inaa wëe chitoonide; nepirade jõnide;

⁵ awaraarãpa tai wımaa p'anide; carcelde chitoonide; tai pee k'iniapa awara ãyaa jëret'aa jõnide; mimia chaaree oo jõnide; k'ãi-ee ewari jõnide; jarra oo jõnide.

⁶ Ichiaba ak'ıpipata tai Tachi Ak'õrepa pëida nãga oo p'anipa. K'ıra jıp'a nipapata, ne-inaa k'achia ooda-ee. Taipa k'awa p'ani Tachi Ak'õrepa ichi ũraa wãarata jara k'inia bi tai it'aideepa. K'ırau-ee choopata awaraarãpa taimaa ik'achia jaradak'ãri maa-e pırã tai oo iru p'anadak'ãri. T'ãri pia p'anapata awaraarã ome, Tachi Ak'õre Jaure tai ome bapari perã. Mapa t'ãripa awaraarã k'inia iru p'ani Tachi Ak'õrepa ichideerã k'inia iru baparik'a.

⁷ Jarateedak'ãri, chi ũri p'anıırã maarepida k'ũradak'aa. Tachi Ak'õrepa oopi bik'a oopata. Mapa irua tai pia ak'ıpari. Iruata tai k'aripapari waaweeda-ee jarateedamerã mãik'aapa taimaa k'ĩsia k'awaapipari pia p'anaudamerã awaraarãpa tai imiateedak'ãri.

⁸ Eperãarã ũk'uruurãpa tai pia ak'ıpata. Jõdee awaraarãpa tai k'ıra unuamaa iru p'anapata. Ichiaba eperãarã ũk'uruurãpa tai ãpıte ik'achia pedeepata. Jõdee awaraarãpa tai ãpıte pia pedeepata. Eperãarã ũk'uruurãpa jara p'ani taipa seewa jarateepata. Mamıda mãga-e. Taipa wãarata jarateepata.

⁹ Eperãarã ũk'uruurãpa jara p'ani: “Jã Pablo eperã jıp'aa. ¿K'ãare-it'ee iru pedee ũridaima?” Mamıda Tachi Ak'õrepa mi k'ıra Cristodeerãmaa pia k'awapipari. Taipa k'awa p'ani atu p'anide piudai k'achia beerã juapa. Mamıda at'ãri chok'ai p'ani.

Awaraarãpa tai p'ua oopata mãik'aapa miapipata. Mamĩda tai peeda-e.

10 Wãara, edaare tai k'ĩra pia-ee p'ani. Mamĩda Tachi Ak'õrepa ichita waya tai t'ãri o-ĩapipari. Ma awara tai net'aa mak'iaara wẽe p'ani. Mamĩda ne-inaa pia teepata awaraarãmaa jarateedak'ãri Cristopa ooda ãchi k'aripait'ee. Na p'ek'au eujãdepema net'aa wẽe chitooni mĩda, iru p'ani jõma Tachi Ak'õrepa k'ĩsia iru bi ichideerã-it'ee.

11 Ìpemaarã Corinto p'uurude p'anĩrã, taipa parãmaa jĩp'a jaramaa p'ani jõma tai t'ãride iru p'ani.

12 At'ãri taipa parã k'inia iru p'ani. Jõdee parãpa tai k'inia iru p'anada-e naawedapemak'a.

13 Mia parã ũraait'ee ak'õrepa ichi warra ũraaparik'a. T'ãriipa tai k'inia iru p'anapatáati taipa parã k'inia iru p'anapatak'a.

Ijãadak'aa beerã ome k'õp'ãyo meraadaik'araa bi

14 K'õp'ãyo meraanáati Cristode ijãadak'aa beerã ome. Eperãpa Cristode ijãak'ãri, ne-inaa pia oo k'inia bapari. Mamĩda Cristode ijãa-e bak'ãri, ne-inaa k'achia oo k'inia bapari. Auk'a p'anadak'aa. Chi pia oo k'inia bipa mãga oopari k'awa bairã Cristopa mãga oopipari. Mamĩda chi k'achia oo k'inia bipa mãga oopari Tachi Ak'õre k'awa-e bairã. Ìdaa pik'a bide p'anĩrã auk'a nipadak'aa p'ãriu pik'a bide p'anĩrã ome.

15 Cristo k'õp'ãyo-e Netuara Poro Waibia Beliál apata ome. P'oyaa auk'a nipadak'aa. Ichiaba Cristode ijãapari p'oyaa auk'a nipak'aa ijãadak'aa beerã ome.

16 Tachi Ak'õre ichita chok'ai bapari. Iru Cristode ijãapataarã ome bapari. Mapa tachi iru ték'apí p'ani. Iru ba k'iniak'aa ne-inaa ai k'ĩrapite it'aa t'ĩpata tede, ma te ijãadak'aa beerãde perã. Ba k'iniak'aa ijãadak'aa beerã ome. Maperãpi ãra ome k'õp'ãyo meraadaik'araa bi. Tachia k'awaadai Ak'õrepa mãga k'inia bi ichi chonaarãwedapema ũraa p'ãdade jara bairã:

'Mi ãra t'ãide ãra t'ãri chaa bapariit'ee. Mi ãra Ak'õre pait'ee. Jõdee ãra michideerã padait'ee.'

(Lv 26.12)

17 Tachi Ak'õre wãara mãgá bapari perã ichideerã ome, ichiaba jara bi awara ãi ma ũraa p'ãdade:

'Åyaa wãti ijãadak'aa beerã ik'aawaapa. Oonãati ãchia ne-inaa k'achia oopatak'a. Mãpaipi mia parã pia ak'ipariit'ee.'

(Is 52.11)

18 'Mi parã Ak'õre pait'ee. Jõdee parã mi war-rarã padait'ee.'

(2 S 7.14)

Mãga jara bi Tachi Ak'õre Waibiapa.

7

¹ Ipemaarã k'iniarã, Tachi Ak'õrepa mãga jarada perã, oo amaadãma ne-inaa k'achia k'ĩra t'ãdoo; tachi k'ap'iaapa oopata mãik'aapa t'ãridepai k'ĩsiapata oodait'ee. Ma k'achia oodai k'ãyaara, ne-inaa jõmaweda oodãma Ak'õrepa oopi bik'a. Mãga oodak'ãri, Tachi Ak'õremaa ak'ipidai iru wãara waawee p'ani.

Corinto pidaarãpa Pablo pedee ũridap'edaa

² Taimaa k'awapíti wãara tai k'inia iru p'ani. Parã t'ãide nipadak'ãri, taipã apidaamaa ne-inaa

k'achia ooda-e paji. Ichiaba apidaamaa jara-teedak'aa paji Ak'õrepa jarapida awara, mǎgide ijǎadamerǎ. Ma awara eperǎ apida k'ũradak'aa paji.

³ Mia mǎga jarak'ǎri, jara-e bi parǎ k'ĩsia p'uapiit'ee. Mia et'ewapai jaradak'a na k'art'a p'ǎ bide, t'ǎripa taipa parǎ k'inia iru p'ani. Tai chok'ai p'ani misa mǎik'aapa piuruta pijida, parǎ mǎgǎ k'inia iru p'anadait'ee, parǎ tai ome auk'a Cristodeerǎ perǎ.

⁴ T'ǎripa mia nǎga jara k'inia bi. Mi t'ǎri o-ǎa bi parǎ ome, k'awa bairǎ parǎpa oo k'inia p'ani mia ũraa bik'a. Tachi Ak'õrepa mi mǎgǎ o-ǎapi bi, tai at'ǎri chupirira chitooni mǎda.

⁵ Nama Macedonia eujǎde pachedak'ǎri, p'oyaa k'ǎiwee p'anadak'aa paji. Tai wǎrutamaa awaraarǎpa tai ome nepira jiripachida. Ma awara t'ǎridepai tai k'ĩsia jõnapachida.

⁶ Mamǎda Tachi Ak'õrepa chi k'ĩsia jõnirǎ t'ǎri o-ǎapipari pipirara bi. Mǎgǎ tai t'ǎri o-ǎapiji Tito nama pachek'ǎri.

⁷ Ichiaba tai t'ǎri o-ǎapiji Titopa nepirida ũridak'ǎri. Irua taimaa jaraji parǎpa iru t'ǎri o-ǎapidap'edaa parǎ t'ǎide bak'ǎri. Jaraji parǎpa mi unu k'inia jõni. Ichiaba jaraji parǎ k'ĩsia p'ua jõni, parǎdepema ũk'uruurǎpa mi ǎpíte pedee k'achia jaradap'edaa perǎ. Maap'eda Titopa jarak'ǎri parǎpa mia ũraadak'a wǎara oo k'inia p'ani, mi audupirara o-ǎa beeji.

⁸ Mia k'awa bi chi awaraa k'art'a parǎmaa p'ǎ pëidade parǎ k'ĩsia p'uapiji. Mǎga ooji mǎda, mi k'ĩsia p'ua-e. Wǎara ma k'art'a pëik'ǎri, mi k'ĩsia p'ua bak'aji, k'awada perǎ ma k'aurepa parǎ k'ĩsia p'ua p'anadai, taarǎ-e mǎgǎ p'anajida mǎda.

9 Mamĩda ĩrá k'ĩsia p'ua bai k'ãyaara, mi o-ĩa bi. O-ĩa-e bi parã mǎgá k'ĩsia p'ua p'anadap'edaa perã. Mi o-ĩa bi parãpa ma k'ĩsia k'achia mi ãpĩte iru p'anadap'edaa ĩrá k'ĩra atuadap'edaa perã. Wãara mia parã k'ĩsia p'uapi-e paji. Ak'õrẽpata mĩmaa mǎga p'ãpiji parãpa oodamerã irua oopi k'inia bik'a.

10 Wãara Tachi Ak'õrepa eperãarã k'ĩsia p'uapik'ãri, mǎga oopari ãchia ne-inaa k'achia oo amaadamerã mǎik'aapa Cristode ijãadamerã. Mǎgá irude ijãadak'ãri, k'ĩsia p'ua p'anada-e. Jõdee awaraarã, ãchia p'ek'au k'achia oopata k'aurepa k'ĩsia p'ua jõni mĩda, ma p'ek'au k'achia oo amaada-e. Maperãpi atuadait'ee.

11 Taipa k'awa p'ani wãara Tachi Ak'õrẽpata parã k'ĩsia p'uapi baji, parãpa tai ome isapai t'ãri auk'a bi k'inia p'anadap'edaa perã. Ichiaba jõma k'awapijida taimaa, parã pia ak'idamerã. Ichiaba parã k'ĩrau p'anajida chi nepĩra jiri p'anĩrã ome. Ma awara waawee p'anajida, mǎgĩrã k'aurepa Tachi Ak'õrepa parãmaa ne-inaa k'achia ooi jĩak'aapa. Ichiaba iidijida mia waya parã ak'inamerã. Parãpa ne-inaa pia oo k'inia p'ani Ak'õrepa oopi bik'a, yiarã iru ba k'inia p'anadairã chi nepĩra jiridap'edaarã. Ma jõma oo p'anĩpa taimaa k'awapi p'ani parã wãara ma nepĩrade t'ũ k'iniada-e paji.

12 Ma k'art'a parãmaa p'ãk'ãri, k'ĩsia-e paji chi k'achia oo badade. Ichiaba k'ĩsia-e paji chi apema ma k'achia oodapa t'ãri p'uapidade. Ma k'art'a p'ãk'ãri, mia k'inia baji Tachi Ak'õre k'ĩrapite k'awaadamerã parãpa tai wãara pia ak'ipata Ak'õrepa pẽidak'a.

¹³ K'awaadak'ãri parãpa tai wãara mãgá ak'ipata, tai t'ãri o-ïa p'aneejida.

Mamïda audupiara o-ïa p'ani Tito auteebaidap'edaa perã iru parãmaa wãk'ãri. Mãga oodak'ãri, iru ichiaba t'ãri o-ïapijida.

¹⁴ Tito nãik'aapa parãmaa wãi naaweda, mia iru-maa jaraji parãpa mãga oodai. Wãara oojida mia jaradak'a. Mi k'ïra nejasiapida-e paji. Mia wãarata parãmaa jaraji ma p'ãdade mãik'aapa parãpa wãara oojida mia Titomaa jaradak'a.

¹⁵ Mãga oodap'edaa perã, Titopa parã audupiara k'inia iru bi naawedapema k'ãyaara. K'irãpa bi parãpa oojida jõmaweda irua oopidak'a. Mãga oojida waawee p'anadap'edaa perã, pãchia oo k'iniata oodait'ee. Jïp'a oo k'inia p'anajida Ak'õrepa jarapidak'a Tito it'aideepa.

¹⁶ Maperãpi mi o-ïa bi. Mia k'awa bi ne-inaa jõmaade parãpa mia jara bik'a oo k'inia p'ani.

8

Cristode ijãapataarãpa p'arat'a teedaipia bi awaraarã k'aripadait'ee

¹ Ipemaarã, parãmaa mia nepiri k'inia bi Tachi Ak'õrepa ne-inaa pia ooda Macedoniadepema ijãapataarã t'ãide.

² Nepirade p'anajida mïda, Tachi Ak'õrepa ãra o-ïapipachi. Mãgá o-ïa p'anapachida mak'ïara p'arat'a wëe chitoonajida mïda. Mãgá chitoonide ãchi p'arat'a iru p'anidepema waibia teejida awaraarã k'aripadait'ee.

³ Teejida ãchia p'oyaarutapai mãik'aapa ai ïri waa teejida. Mia mãga jara bi michi taupa mãga unuda

perã ãra t'ãide nipak'ãri. Eperã apidaapa ãramaa jarada-e paji mǎgá teedamerã. Teejida t'ãripa tee k'inia p'anadap'edaa perã.

⁴ Mǎgá k'aripa k'inia p'anadap'edaa perã, taimaa enenee jǎnajida ãchia p'e aneedap'edaa jitadamerã mǎik'aapa ateedamerã ijãapataarã Judea eujǎde chupiria beerãmaa.

⁵ Mamida ma teedap'edaa k'ãyaara ne-inaa piara oojida. Taipa k'ĩsiada-e paji mǎga oodai. It'aa t'ĩjida Tachi Waibiaamaa jaradait'ee ãchia oo k'inia p'ani irua oopi bik'a. Mǎpai jarajida taimaa ãchia oo k'inia p'ani taipa oopirutak'a. Mǎga oojida ijãa p'anadap'edaa perã ãramaa Ak'õrepa mǎga oopi baji.

⁶ Macedoniadepemaarãpa oo p'ani unudap'eda, taipa Titomaa chupiria iidijida iru waya parã k'aripade wãmerã, t'ãri piapa parãpa p'arat'a ichiaba p'eruta misa tee pëidait'ee. Irua naaweda k'aripadak'a ewaa ma p'arat'a p'e wãdak'ãri, ãrã auk'a k'aripait'ee jǎma p'e aupadamerã.

⁷ Parãpa Cristode pia ijãapata. Ichiaba awaraarãmaa pia jarateepata Cristopa ooda eperãarã k'aripait'ee. Pia k'awapata Cristopa oopi k'inia bi parãmaa mǎik'aapa pia k'ĩsiapata awaraarã k'aripadait'ee. Ma awara taimaa pia ak'ipipata tai k'inia iru p'ani. Ma jǎma ne-inaa pia oopatak'a taipa k'inia p'ani auk'a chupiria beerã pia k'aripadamerã pãchi p'arat'a tee p'anipa.

⁸ Mǎga jarak'ãri, mia jara k'inia-e: “Waibia téeti.” Jip'a nepiriji Macedoniadepema ijãapataarãpa oodap'edaa parãpa auk'a teedamerã, t'ãripa mǎga oo k'inia p'anadairã. Mǎgá teeruta pirã,

jõmaarãmaa ak'ipidait'ee awaraa ijãapataarã auk'a k'inia iru p'ani, ãra k'ira k'awada-e p'ani mïda.

⁹ Parãpa k'awa p'ani Tachi Waibia Jesucristopa ooda ak'ipiit'ee parã k'inia iru bi. It'ari Tachi Ak'õre k'ira wãreede bapachi mïda, eperãarã chupiria k'awaa bapachi. Maperã ichia Ak'õre eujãde iru bada jõmaweda atabëiji chupiria nïba cheit'ee na p'ek'au eujãde. Mãga ooji parã o k'achiadeepa k'aripa ata k'inia bada perã, irude ijãadap'eda, Ak'õre truade iru ome p'ananadamerã.

¹⁰ Írá mia parã ùraait'ee apema año p'arat'a p'e wãdap'edaa p'e aupadamerã. Parãpa apemaarã ijãapataarã k'ãyaara naapiara k'isia iru p'anajida p'arat'a p'e teedait'ee chupiria beerãmaa. O-ia p'anajida mágá k'aripa k'inia p'anadap'edaa perã.

¹¹ Mágá t'ãriipa tee k'inia p'anadap'edaak'a, írá auk'a t'ãri o-ia tee k'inia p'anadaipia bi, p'arat'a mak'iaara wëe p'ani jida pëidait'ee.

¹² Tachi Ak'õrepa ak'ipari tachi t'ãride iru bi. Ichia k'inia bi t'ãriipa tee k'inia p'anadamerã. Ma-ãri iru p'ani pirã, ma-ãri teedai t'ãri piapa. Jõdee waibia iru p'ani pirã, waibia teedai t'ãri piapa. Teedait'ee wëe p'ani pirã, ¿sãga teedai?

¹³ Mia k'inia-e parã chupiria p'aneedamerã awaraarã k'aripa k'iniapa.

¹⁴ Nãgapai mia k'inia bi: auk'a iru p'anadamerã te, chik'o mãik'aapa p'aru. Írá parãpa awaraarã k'ãyaara waapiara iru p'ani pirã, teedai ãra k'aripadait'ee. Jõdee parã chupiria jõnadak'ãri, ãrapa parãmaa teedai.

¹⁵ K'awa p'ani Tachi Ak'õrepa ichia jirit'erada eperãarãmaa teepari mágá jededamerã, iru

chonaarãwedapema ũraa p'ãdade jara bairã:
 'Chi maná waibiara p'edap'edaarãpa
 waibiara jitada-e paji. Jõdee ma-ãriara
 p'edap'edaarãpa ma-ãriara jitada-e paji.
 Jededak'ãri, auk'a jita wãjida.' (Ex 16.18)

*Pablopa Tito Corinto p'uurudee pëit'ee bada
 (1 Co 16.1-4)*

¹⁶ Mia gracias jara bi Tachi Ak'õremaa irua parã
 k'aripamaa bairã Titopa oo bi k'aurepa. Mia
 ooparik'a Titopa auk'a parã k'aripa k'inia bi.

¹⁷ Mia mãga k'awa bi iru o-ãa bada perã chupiria
 iididak'ãri irumaa parã ak'ide wãmerã. Audú wã
 k'inia nĩbaji. Wãara taipa mãga iididai naaweda,
 k'ĩsia iru baji wãit'ee. Mapa wãit'ee mãga k'inia
 bairã.

¹⁸ Tito ome awaraa ñpema auk'a pëidait'ee.
 Ijãapataarã bee chaa nama Macedonia eujãde
 jõmaarãpa mãgí k'awa p'ani, Cristopa ooda
 eperãarã k'aripait'ee pia jarateepari perã.

¹⁹ Ma ijãapataarãpa mãgí jirit'erajida auk'a tai
 ome nipamerã, p'arat'a p'e atee wãrutade Judead-
 epema chupiria beerãmaa. Ma p'arat'a tee pëi
 p'anipa tachia jõmaarãmaa ak'ipidai oo k'inia p'ani
 Tachi Ak'õrepa oopi bik'a. Irua ne-inaa tachi-
 maa teepari, tachia jõdee teedamerã chupiria
 beerã k'aripadait'ee, ma awara ak'ipidait'ee ma
 ijãapataarã chupiria beerãmaa tachia wãara ãra
 k'aripa k'inia p'ani.

²⁰ Ma ñpema mãgá Tito ome pëidait'ee irua
 k'aripamerã ma p'arat'a waibia p'e ateeru misa.
 Mãgá tai imiateepataarãpa pedee p'anada-e pai tai
 ãpíte, p'arat'a ũk'uru chiadai jĩak'aapa.

21 Ichita ne-inaa k'ĩra jĩp'a oo k'inia p'ani Ak'õre k'ĩrapite m̃aik'aapa eperãarã k'ĩrapite.

22 Ipema awaraa ichiaba p̃eidait'ee ãra ome. Irua tai ichita k'aripa k'inia bi m̃aik'aapa ne-inaa pia oopari taipa oopipatak'a. Irua k'awaak'ãri Tito parãmaa wãru m̃aik'aapa parã t'ãri piapa auk'a p'arat'a tee p̃eidait'ee, o-ĩa auk'a wã k'inia baji.

23 Parã t'ãidepema Tito k'awa-e bi p̃irã, jarãti iru mi k'õp'ãyo pia na mimiade. Mi ome mimia-pari parã k'aripait'ee. Iidiruta p̃irã apema omé nidaarã pari, jarãti nãpema ijãapataarãpa ãchi pari p̃eidap'edaa, ichiaba auk'a k'aripadamerã. Mãirã wãrutamaa k'awapipata jõmaarãmaa Cristota Tachi Waibia.

24 Mãirã araa panadak'ãri, ak'ipíti ãra k'inia iru p'ani tai k'inia iru p'anik'a. Mãgá waya wãdak'ãri ãchi p'anapatamaa, nepiridai parãpa ãra pia ak'i p'anadap'edaa. Mãgá ãra p̃eidap'edaarãpa k'awaadai wãara taipa jaradak'a parãpa wãara nejõmaata pia oo k'inia p'ani.

9

Ijãapataarãpa awaraarãmaa p'arat'a teedaipia bi

1 Wãara na p'ãdade mia parãmaa waa jara-e pijida, k'awa bi parãpa ma p'arat'a p'e tee p̃eidait'ee ijãapataarã chupiria beerãmaa.

2 Mãga k'awa bi parãpa wãara chupiria beerã k'aripa k'inia p'anadairã. Año aba paru parã Acaya eujãdepema ijãapataarãpa ma p'arat'a p'ema p'aneedap'edaa. Mãga oo p'aneedak'ãri, taipa o-ĩa nepirijida na Macedoniadepema ijãapataarãmaa. Mãga ũridak'ãri, ãrapa auk'a k'aripa k'inia p'aneejida.

³ Maperãpi taipa Macedoniadepema ïpemaarã omé auk'a pëiruta Tito ome, parãpa ãramaa ak'ïpidamerã wãara oojida taipa jaradak'a. Mia k'inia bi ma p'arat'a p'e iru p'anadamerã, aramãgá tee pëidait'ee.

⁴ Mi jãma panak'ãri, awaraa Macedoniadepema ïpemaarã auk'a cheruta pirã mi ome mãik'aapa parãpa waide ooda-e pirã taipa jaradak'a ãchimaa, tai k'ïra nejasia p'aneedai; parã jida ichiaba.

⁵ Mapa mia chupiria iidiji Titomaa iru chi apema ïpemaarã ome mi naa wãdamerã. Mãgá ãrapa parã k'aripadai parãpa k'ïsia iru p'anadap'edaak'a; p'arat'a jômaweda p'e iru p'anadamerã mi panaru misa. Mãgá ichiaba apidaapa jarada-e pai mia parãmaa teepida. Mia k'inia bi parãpa t'ãri pia teedamerã pãchia tee k'iniata.

⁶ ¡K'irãpãti! Eperãpa eujã ma-ãriide ne-uuk'ãri, mak'ïara ewa-e. Jõdee chi eujã waibiade ne-uu bïpa waibia ewapari.

⁷ Eperã chaachaa teeipia bi ichi t'ãride k'ïsia bik'a. Teeik'araa bi teemaa bide wa awaraapa irumaa teepi bairã. Tachi Ak'õrepa chi t'ãri pia teepari k'inia iru bi.

⁸ Parãpa mãgá t'ãri piapa teeruta pirã, Tachi Ak'õrepata parã k'aripai iru p'anadamerã te, chik'o mãik'aapa p'aru. Ma awara irua k'aripai audupïara iru p'anadamerã k'aripadait'ee awaraarã parã k'ãyaara chupïriara chedee.

⁹ Tachi Ak'õre chonaarãwedapema ùraa p'ãdade jara bi:

'Eperã t'ãri pia bïpa ne-inaa pia oopari chupiria beerãmaa t'ãri pia bairã. Maperãpi Tachi

Ak'õrepa mǎgí ichita pia ak'ipariit'ee.' (Sal 112.9)

¹⁰ Tachi Ak'õre, chi net'atau oodapa ne-uu chaupipari, jõmaarãpa iru p'anadamerã k'odait'ee. ¿Audupiarã teei-ek'ã chi t'ãri pia p'anirãmaa ãchia awaraarã k'aripadamerã?

¹¹ Tachi Ak'õrepa mǎga oopari perã, parãmaa auk'a teeit'ee, parã auk'a t'ãri pia p'anadairã. Mǎgá parãpa waibia iru p'anadait'ee tai ome tee pëidait'ee Judeadepema chupiria beerãmaa. Mǎpai o-ãpa ãchia gracias jaradait'ee Tachi Ak'õremaa ma p'arat'a tai juadepema jitadak'ãri.

¹² Mǎgá parãpa k'aripadait'ee ãrapa iru p'anadamerã k'odait'ee mǎik'aapa jidait'ee. Mamida ichiaba k'aripadait'ee ãrapa Tachi Ak'õremaa gracias jaradamerã.

¹³ Ma awara nǎgá pia tee p'anipa awaraarãmaa mǎik'aapa ãramaa, k'awaadait'ee parãpa Jesucristode wãara ijãapata mǎik'aapa oo k'inia p'ani irua oopi bik'a.

¹⁴ Ichiaba ãrapa parã k'awa k'inia p'anadait'ee mǎik'aapa it'aa t'í k'inia p'anadait'ee parã pari, Tachi Ak'õrepa parã mǎgá k'aripapari perã.

¹⁵ Gracias jaradáma Tachi Ak'õremaa irua jõmaarã k'ãyaara ne-inaa pipiarã bi teeda perã, ichi warra pëik'ãri tachi k'aripade. Pedee wëe pik'a p'ani ma pari irumaa gracias jaradait'ee.

10

Pablopa jarada ichi wãara Cristopa pëida

¹Írá mi, Pablopa parã ùraait'ee Cristopa ùraadak'a na eujãde nipak'ãri. Irua t'ãri pia, k'írau-ee ùraaji.

Mia k'awa bi parã t'ãidepema ùk'uruurãpa jara p'ani mi waawee pik'a bi parã k'ĩrapite bak'ãri, jõdee k'art'a p'ãk'ãri, audú itria pedee jarapari.

² ¿Mãirãpa jara p'ani-ek'ã michi k'ĩsiadoopapai jaratee nipapari, jarateepataarã jĩp'aarãpa oopatak'a? Mapa parãmaa mia enenee nĩbi mãirã ik'aawaapa uchiadamerã mi jãma pai naaweda. Mãga jara bi mia wãara ãchi itriait'ee perã, Ak'õrepa mimaa mãgá pedeepiru pirã.

³ Wãara, tai na eujãde p'anapata eperãarã jĩp'aarãk'a. Mamĩda mãirãk'a tai aupedeedak'aa.

⁴ Mãirã pedee wēsaa, imeraa pedee-pata. Mamĩda tai jĩp'a pedee-pata Ak'õrepa pedee-pi bik'a. Mãgá jõpipata jõma ãchia k'ĩsia iru p'ani Cristode ijãapataarã ijãa amaapidait'ee.

⁵ Taipa jõpipata ãchia seewa jarapata, Ak'õrepa tai it'aideepa wãarata jarak'ãri. Ma awara Ak'õrepa tai k'aripapari p'anaudamerã jõma ãchia Cristo ãpĩte seewa jarapata. Mãgá ãchia wãara k'awaadai Ak'õrepa k'ĩsia iru bada ooit'ee Cristo k'ap'ia pari. Ichiaba taipa Cristopa ooda ãchi-it'ee jarapata, ãchia auk'a wãara irude ijãadamerã.

⁶ Mamĩda mãgá ijãa k'iniada-e p'ani pirã, ãchi t'ãri p'uapidai Ak'õrepa oopi bik'a. Taipa mãga oodait'ee parãpa ak'ipidak'ãri wãara oo k'inia p'ani taipa jara p'anik'a.

⁷ Parã Corintodepemaarãpa eperãarã ĩripai ak'ipata. Æchi k'ĩra ak'ipata mãik'aapa ãchia audua pedee jara jõni ũripata, ãchi t'ãride iru p'ani k'awa k'inia p'anadai k'ãyaara. ¿Mãga-ek'ã? Parã t'ãidepemapa k'ĩsia bi pirã ichita wãara Cristopa pẽida jarateemerã, auk'a k'awaaipia bi tai jida

Cristopa pëida.

⁸ K'ira nejasia-ee mia nãga jarait'ee. Tachi Waibiapa wãara jarapari tai it'aideepa mãik'aapa parã biji tai jua ek'ari, taipa parã k'aripadamerã iru pari. Mapa taipa maarepida parãmaa ijãa amaapidak'aa. Jïp'a k'aripapata pipiara Cristode ijãadamerã.

⁹ Mia parã p'erapi k'inia-e bi k'art'a p'ädade pedee bïpa.

¹⁰ ¿Mi ãpïte pedeepataarãpa jara p'ani-ek'ã: “Pablopa k'art'a parãmaa p'ãk'ãri, audú itria pedee jarapari. Mamïda ichi parã k'ïrapite bak'ãri, waawee pik'a nïbeeparida” a jõni-ek'ã?

¹¹ Mãirãpa k'awaadaipia bi ãchia jaradak'a, mia wãara itria pedee jarait'ee, mamïda ãchi k'ïrapite panak'ãri.

¹² Taipa ooda-e ãchia oopatak'a. Æchia mãgapata: “Taipa jara p'anik'a, Cristopa pëida eperãarã mãgã p'anadaipia bida” apata. Mãpai ãchi pitapai mãgapata: “Táipata jõmaarã k'ãyaara Ak'õre net'aa pipiara k'awa p'anida” apata. Mãirãpa awaraarã ak'ida-e Tachi Ak'õrepa ak'ïparik'a. Irua k'awapari eperã t'ãride iru bi. Jõdee ãchia ïripai ak'ïpata. Chi mãgã oo p'anirã k'ïsia k'awada-e p'ani.

¹³ Tachi Ak'õrepa k'awa bi tai t'ãride iru p'ani. Taipa pida ichiaba k'awa p'ani. Iruata tai pëiji judio-eerã t'ãidee Cristopa ooda jarateede chi waide ùrida-ee p'anirãmaa. Maperãpi parã t'ãide jaratee nipajida. Oojida Ak'õrepa oopidak'a.

¹⁴ Ak'õrepa tai parãmaa pëi-e pada paara, maarepida jarateeda-e pak'aji. Mamïda mãga-e paji. Irua tai naapiara pëiji parã

t'ãidee, jarateedamerã Cristopa ooda eperãarã k'aripait'ee.

¹⁵ Mamĩda ¿mi ãpĩte pedeepataarãpa jara jõni-ek'ã ãchiata Ak'õre net'aa pia jarateepata? Mãga jarapata parãpa ãchi mi k'ãyaara pipiara ak'idamerã. Taipa mãgá oodak'aa. Jĩp'a taipa k'inia p'ani parãpa pipiara k'awaa k'inia p'anadamerã Cristopa parãmaa oopi k'inia bi. Mãga k'awaadak'ãri mãik'aapa wãara oodak'ãri irua oopiparik'a, parãpa tai audupiara k'aripadai na mimia ome.

¹⁶ Tai mãgá k'ariparuta pirã, parã t'ãideepa t'imipiara wãdai jarateede. T'ĩu k'iniada-e awaraa jarateepataarã mimia p'animãi, tai nipada-e perã awaraa jarateepataarã nipapatak'a. ãchia ne-inaa ooda-eeta jara nipapata ne-inaa oodak'a.

¹⁷ Tachi Ak'õre Ũraa p'ãdade jara bi:
'Eperãpa jara k'inia bi pirã ichiata ne-inaa k'awaara bi awaraarã k'ãyaara, mãga jaraipia bi ichia k'awaa bairã Tachi Ak'õrepa iru pia ak'ipari.' *(Jer 9.23-24)*

¹⁸ Parãpa chi pedee audua pedeepari pia ak'idaik'araa bi. Jĩp'a pia ak'idaipia bi eperã Tachi Ak'õrepa pia ak'ipari.

11

Pablopa jarada ichi ãpĩte pedeepataarã Cristopa pẽida-e

¹ Írá mia k'inia bi parãpa choodamerã mi k'ĩsia k'awa-ee pik'a pedee bi misa. Mi chupiria k'awáati. Mamĩda mãgá pedeei naaweda, mia nãga jara k'inia bi.

² Tachi Ak'õrepa parã k'inia iru bik'a, mia pida parã k'inia iru bi. Ara eperãpa ichi k'au jiwaa-parik'a iru araa pai naaweda chi imik'ira ome, mãga pik'a mia parã jiwaa pik'apari. K'inia bi Cristodepai ijãadamerã mia parãmaa jarateedak'a.

³ Mamida mia waawee bi Netuara Poro Waibiapa chi naapiara wëra Eva k'uradak'a, parã jida auk'a k'urai jãak'aapa. Irua imeraa pedeeji Evamaa taama it'aideepa, Evapa Tachi Ak'õrepa jarada ijãa amaamerã. İra auk'a parãmaa imeraa pedee bi mi ãpıte pedeeptaarã it'aideepa, parã Cristode ijãa amaa wãdamerã.

⁴ Jarateepari tai awara parã t'ãide panak'ãri, ¿parã k'iri ãesaa p'ani-ek'ã ũridait'ee mãgıpa jara bi? Parã mãga p'ani, mãgıpa jaratee ni mıda Jesús awara bi taipa jarateedap'edaa k'ãyaara. Ichiaba mãgá ũri k'inia p'ani, mãgıpa jaratee bi mıda Tachi Ak'õre Jaure awara bi taipa jarateedap'edaa k'ãyaara. ¿Taipa parãmaa jarateeda-e pajik'ã Cristopa tachi o k'achiadeepa k'aripa atapari iru piuda k'aurepa? Mãga bita, ¿sãap'eda parãpa ũri k'inia p'anima mãgıpa jaratee bi?

⁵ Parãpa mãgı 'Cristopa pëida pipiara bi' chi k'õp'ãyoorã ome pipiara ak'i p'ani mıda Ak'õrepa pëida k'ãyaara, mia ãchi mãga ak'i-e. Mi ãchi k'ãyaara ek'ariara bi-e, Ak'õrepa mi na mimia oode pëida perã.

⁶ Wãara, mia pedee wësa pedee'aa ãchia oopatak'a. Mamida pia k'awa bi mia jaratee bi. Parãpa pia k'awa p'ani taipa ichita ne-inaa jõmaweda k'ira jıp'a jarateepata.

Pablopa Corinto pidaarã juadepema p'arat'a

jita k'inia-e pada

7 ¿Parāpa k'ĩsia p'anik'ã mia ne-inaa k'achia ooji parã juadepema p'arat'a jita-e pak'ãri? Parã t'ãide bak'ãri, michi juadoopa mimia bapachi p'arat'a jitait'ee chik'o-it'ee. Jōdee mia Tachi Ak'õre pedee pia jarateeji parāpa pipiara k'awaadamerã Cristopa parāmaa oopi k'inia bi. Jaratee-e paji parã p'arat'a jita k'iniapa.

8 Ma k'ãyaara p'arat'a jitaji awaraa ijāpataarã juadepema. Āra p'arat'a jãri pik'a ataji parã k'aripait'ee.

9 Ma awara parã t'ãide bak'ãri, p'arat'a wa ne-inaa wē-e pak'ãri, mia parāmaa maarepida iidi-e paji. Macedoniadepema ipemaarã mimaa chedak'ãri, mi k'aripajida. Mamīda mia parāmaa iidi-e paji māk'aapa iidi-e pait'ee waya parã ak'ide wāk'ãri.

10 Mia wāarata jara bi Cristopa wāarata jaradak'a. Acaya eujādepema apidaapa mia jarada awara mimaa oopida-e pait'ee.

11 K'ĩsianáati mia parã p'arat'a jita k'inia-e paji, parã k'inia-e bada perã. Tachi Ak'õrépata k'awa bi mia parã k'inia iru bi.

12 Mia parã p'arat'a jita k'inia-e nāga perã. ¿Mi āpite pedeepataarãpa jara p'ani-ek'ã āchi wāara Cristopa parāmaa pēida, parāpa p'arat'a p'aapata perã āchi mimia pari? P'arat'a iidi wāpata āchi wārutamaa. Mamīda taipa māga oodak'aa. ¿Jara p'ani-ek'ã āchi auk'a p'ani tai ome? Mamīda taipa p'arat'a iididak'aa tai jarateepata pari.

13 Māgee eperārã Cristopa pēida-e. Āchita Cristopa pēidada a p'ani mīda, māga p'ani-e. Jīp'a

k'ũrayaa p'ani. Seewata jaratee nipapata Cristopa pëida eperãarãk'a.

14 Parã p'era pik'a p'anadaik'araa bi k'awaadait'ee ãchia mǎgá k'ũra nipapata. Netuara Poro Waibia seewata it'aripema ángel k'ĩra wãree pik'a padaipari eperãarã k'ũrait'ee.

15 Mǎgá ichi mimiapataarã auk'a seewata Cristopa pëidak'a padaipata. Mǎga oopata eperãarãmaa ijãapidait'ee ãchia jara p'anik'a oodaipia bi Ak'õre eujãdee wãdait'ee. Mamĩda ma jara p'ani k'aurepa Tachi Ak'õre ewari waibia ewate irua mǎgĩrã miapiit'ee, iru k'ĩrapite panadak'ãri.

16 Waya chupiria iidit'ee parãpa mi pedee ũridamerã. Parãdepema ũk'uruurãpa mi k'ĩsia k'awa-ee pik'a ak'i p'ani mĩda, mi ita-aria pedeepti.

17 Tachi Waibiapa mimaa jarapi-e mia ĩrã jarait'ee. K'ĩsia k'awa-ee pik'a mia nǎgĩ pedee audua pedeeit'ee ma seewa jarateepataarãpa oopatak'a.

18 Mǎgĩrãpa jarai awaa p'anadairã ãchia oo p'ani, mia auk'a jarait'ee mia ooda.

19 Mǎgĩrãpa parã k'ĩsia k'awaa p'anida a jõnapata. ¿Mǎga-ek'ã? Mamĩda parã pia choopata ũridak'ãri ma k'ĩsia k'awa-ee beerãpa jara jõni.

20 Wãara pia choopata ãchia parã chok'a p'ani mĩda ãchi esclavoorãk'a. Ichiaba choopata ãchia parã k'ũra p'ani mĩda imeraa pedee p'anipa, p'arat'a teedamerã maa-e pirã ijãadamerã ãchia jaratee p'ani. Ichiaba mǎgá choopata ãchi audua nida mĩda pãchi t'ãide, k'ĩsia p'anadairã parã k'ãyaara ne-inaa jõma pipiara k'awa p'ani. Ma

awara parã mǎgá choopata ãchia parãmaa ik'achia jara p'ani mǐda.

²¹ Mi k'ĩra nejasia pik'a bi taipa mǎga ooda-e p'anadap'edaa perã parãmaa wãdak'ãri. Mamǐda tai waawee pik'a p'anadairã, mǎga ooda-e paji. ¿Wãara-ek'ã?

Ɔrata mi k'ĩsia k'awa-ee pik'a pedeeit'ee. Mi ãpite pedeepataarãk'a mia ooda jarait'ee.

Pablo chupiria nĩbada Jesucristopa pẽida perã

²² Ma seewa jarateepataarãpa mǎgapata: “Táipata hebreo pedee pedeepata.” Mi jida auk'a. Ichiaba mǎgapata: “Taita Ak'õre eperãarã; Israel pidaarã.” Mi jida auk'a. Mǎgapata: “Taita Abrahamdeepa uchiadap'edaarã.” Mi jida auk'a.

²³ ¿Jarapata-ek'ã? “Taita Cristo-it'ee mimiapata.” Mi ãchi k'ãyaara Cristo-it'ee pipiara mimia-pari. Ɔrata mi eperã k'ĩra k'awa-ee bik'a pedeemaa bi. Æchi k'ãyaara mi audupiara ne-inaa k'achia p'asapari: Cristode ijãadak'aa beerãpa mi carcelde t'i nĩbijida; mi wi iru p'anajida; mi perã piuji.

²⁴ Mi wãda joisomaa wãru chaa judiorã waibiarãpa mi wipipachida. Wida treinta y nueve wijida soopa.

²⁵ Wãda õpee wãru chaa Roma pidaarã waibiarãpa mi pak'urupa wipijida. Wãda abaade mi perã piuji judiorãpa mǎupa mimaa bat'adak'ãri. P'usade wãda õpeede barco pirubaaidachi mǎik'aapa ma wãda abaade barco pirubaaip'eda, tok'esá mi pak'uru Ɔri bataudachi k'ãima aba.

²⁶ Mi ode wã nide perã nǎgá piuji: to choma nĩbide sĩa wãde; nechiapataarãpa mi net'aa chia ata cherutade; michi auk'arã judiorãpa mi

wawamaa p'anide; judio-eerãpa mi p'ua oomaa p'anide. Ma awara p'uurude bide mãik'aapa eperãarã p'anadak'aamãi ode wãde, mi jirijida peedait'ee. P'usade wãdade nãumiapa barco atadachi. Edaare Cristode ijãapatada apataarãpa paara pedee k'achia jarajida mi ãpite, mia jarateepari perã ũraa chiwidi Moisepa p'ãda k'ãyaara.

²⁷ K'ãima chok'ara mi ñik'aa paji mãik'aapa p'oyaa k'ãi-e paji mimia nĩbipa maa-e pirã jaratee nĩbipa. Edaare jarrapisia nĩbaji maa-e pirã opisia. Ewari chok'ara mi nek'o-e paji. Ma awara jĩsua nĩbaji, p'aru pia wẽe bada perã.

²⁸ Ma ne-inaa k'achiade mãik'aapa awaraa ne-inaa k'achia mia nama jara-e bide, mi ichita k'ĩsia nĩbaji ijãapataarã bee chaa, ãrapa ijãa amaadai jĩak'aapa.

²⁹ Ijãapari aba juatau wẽedaru pirã, mi jida mãgadaipari. Jõdee awaraapa ma ijãapari p'ek'au k'achiade baaipiru pirã, mi k'ĩraudaipari mãgĩ ome.

³⁰ Mi pedee audua wãara jara k'inia bi pirã, mãgara jarai mi juatau wẽe bada, ijãadak'aa beerãpa mi miapidait'ee pak'ãri.

³¹ Tachi Ak'õre, Tachi Waibia Jesucristo Ak'õrepa k'awa bi mi seewa-e bi na jõma jarak'ãri. jõmaarãpa irumaa ichita o-ĩa it'aa t'ĩdaipia bi, irua ne-inaa jõmaweda oopari perã ichi juapa!

³² Wãara mi Cristode ewaa ijãa bak'ãri, Tachi Ak'õrepa mi uchiapiji mi miapidait'ee p'anadap'edaarã juadeepa. Mãga paji mi Damasco p'uurude bak'ãri. Rey Aretapa jaraji ma p'uuru pidaarã ak'iparimaa p'uuru jĩa paraa bidamerã

mi jita atadait'ee.

³³ Mamīda mi k'ōp'āyoorāpa mi k'aripajida. K'oraa choma bide t'i atajida māik'aapa chi p'uuru ik'aawa t'iak'au jēra bi uria badadeepa mi irabai pēijida. Māgá mi māirā juadeepa uchiaji.

12

Tachi Ak'ōrepa Pablomaa unupida

¹ Michi k'inia ne-inaa awaraa nepirīit'ee, parāpa k'awaadamerā michi ituaba na mimia p'oyaa ook'aa. Jarait'ee Tachi Waibiapa unupida mimaa k'āimok'araa pik'a bide. Ne-inaa eperāarāpa waide k'awada-e p'anadap'edaa mimaa k'awaapiji.

²⁻³ Mia Cristode ijāapari k'awa bi. Catorce años paru Tachi Ak'ōrepa iru ateeji ichi eujādee. K'awae bi sāgá wāji, k'ap'iade wa jauredepai. Tachi Ak'ōrépata k'awa bi. Iru māgá ateeji ichide wāara ijāa bada perā.

⁴ Mama it'ari bide irua ūriji ne-inaa Tachi Ak'ōrepa apidaamaa jarapik'aa.

⁵ Pedee audua wāara jara k'inia bada paara, mia waapiara ma it'aa wādade jarak'aji. Mamīda jīp'a jara k'inia bi michi ituabaapa p'oyaa oo-e pada.

⁶ Ak'ōrepa mimaa unupida audua jarak'aji, k'īra k'awa-ee pik'a, wāara mia māga unuda perā. Mamīda mia māga oo-e pait'ee. K'inia-e bi awaraarāpa mi pia ak'idamerā, Ak'ōrepa ichi eujā mimaa unupida perā. Ma k'āyaara k'inia bi mi pia ak'idamerā mia jaratee bi k'aurepa māik'aapa mi t'āri pia bi k'aurepa jōmaarā ome.

7 Ma awara audua banaamerã ma ne-inaa pia unuda k'aurepa, Tachi Ak'õrepa mi miapiji Netuara Poro Waibia eere bi juapa. Ne-iri tachi k'ap'iade awa nibik'a, mãga pik'a ma netuarapa mi miapipari. Mãgã mia nibide, maarepida mi pedee audua pedee-e bi, michi ituaba aideepa p'oyaa uchua-e bairã.

8 Chupiria iidida õpee enenee nibaji Tachi Waibiamaa mi waa mãgã miapinaamerã.

9 Mamida irua p'anauji: "Mãga-eda aji. Mia pi k'aripait'eeda aji, choomerã. Pi chupiria nibak'ãri mãik'aapa choo-e pak'ãri, mia pi k'aripait'eeda aji, choomerã." Tachi Ak'õrepa mãga jarada perã mi k'ira nejasia-e bi jarait'ee mi chupiria nibada. Mãgã jarai Cristopa mi k'aripapari perã choomerã.

10 Wãara t'ãri o-ia bi Cristo k'aurepa mi nãgã chupiria nibak'ãri: mimaa awaraarãpa ik'achia jaradak'ãri; net'aa wëe bak'ãri; mi imiatee iru p'anadak'ãri; mi k'isia nibak'ãri; mãgã nibak'ãri. Mãgã t'ãri o-ia bai k'awa bairã michi ituaba p'oyaa choo-e pak'ãri, Cristopa mi k'aripait'ee.

Pablopa Corintodepema ijãapataarã k'inia iru bada

11 Parã k'aurepa mi eperã k'ira k'awa-ee pik'a pedee audua pedeemaa bi. Parãpata mi t'o p'anadaipia bi, michi itu t'o bai k'ãyaara. Mi maarepida ek'ariara bi-e ma Cristopa pëida apataarã k'ãyaara, achia mi k'awada-e p'anida a p'ani mïda.

12 ¿Parãpa k'irãpada-e p'anik'ã Tachi Ak'õrepa ooda mi k'ap'ia pari parã t'ãide nipak'ãri? Ma

ooda k'aurepapai parāpa ijāadaipia bi mita wāara Cristopa pēida. Mamīda māga ooda-e paji. Mi k'ap'ia pari Tachi Ak'ōrepa oo bi misa ne-inaa eperāarāpa p'oyaa oodak'aa āchi juadoopa, mi choopachi parādepema ūk'uruurāpa mīmaa imiateedap'edaa.

¹³ Jōma mia ooda apemaarā ijāapataarā t'āide auk'a ooji parā t'āide. ¿K'īsia p'anik'ā parā ape-
maarā ijāapataarā ek'ariara p'ani, mia parā juade-
pema p'arat'a jita-e pada perā? Māga k'īsia p'ani
pirā, ¡mi perdonáati!

Pablo waya Corinto pidaarā ak'ide wāit'ee bada

¹⁴ ¡Ūrítí! Na wārupa parāmaa wāda ōpee pait'ee. Et'ewa jaradak'a mia maarepida iidi-e pait'ee parā juadepema. Parā p'arat'a k'inia-e. Jip'a k'inia bi parāpa wāara Cristode ijāadamerā. Warrarāpa āchi ak'ōreerā ak'idak'aa. Ak'ōreerāpata āchi warrarā ak'ipata.

¹⁵ Mi parā ak'ōrek'a bairā, mia iru bi jōmaweda teei, michi k'ap'ia paara, t'āripa parāpa Cristode ijāadamerā. Mia parā māgá audú k'inia iru bi. Jōdee parāpa mi mak'iarā k'iniada-e iru p'ani. ¿Wāara-ek'ā?

¹⁶ Wāara mia maarepida p'arat'a iidi-e paji parā t'āide bak'āri. Mamīda ¿mi āpíte pedepataarāpa jara jōni-ek'ā mia parā k'ūraji?

¹⁷ ¿Parāpa k'īsia p'ani-ek'ā mia parā k'ūraji mi k'ōp'āyoorā pēida k'aurepa? ¡Mamīda māga-e!

¹⁸ Wāara mia chupiria iidiji Titomaa parā ak'ide wāmerā māik'aapa iru ome awaraa ipema pēiji. Mamīda parāpa pia k'awa p'ani Titopa parā k'ūra-e

paji, iru auk'a mik'a t'āri pia bapari perā parā ome. Auk'a parā k'aripa k'inia p'anapata.

¹⁹ ¿Parāpa k'īsia p'anik'ā mia ma jōma jara aupada jaraji p'anaut'ee mi āpite pedeepataarāmaa, māgā parāpa mi pia ak'idamerā? Māga-e. Tachi Ak'ōrepa k'awa bi mi t'āride iru bi, Cristo mi ome bapari perā. Iruata mīmaa māga jarapiji. Īpemaarā k'iniarā, mia ma jōma jaraji parā k'aripait'ee pipiara Cristode ijāadamerā.

²⁰ Mamīda waawee bi mi jāmaa wāk'āri, parā māga unu-e pai jīak'aapa. Wāara parā waide pia ijāada-e p'ani pirā, parāpa ichiaba mi unu k'iniada-e p'anadai. Mi jāma panak'āri, unu k'inia-e parāpa nāga oomaa p'ani: nepira jirīmaa chīara ome; chīara k'īra unuamaa net'aa k'aurepa; k'īrau jōni chīara ome; jōma k'īa jōni pāchi-it'ee; ik'achia jaramaa chīaramaa maa-e pirā chīara āpite pedeemaa; audua jōni; pariatua ne-inaa oomaa p'ani.

²¹ Ma awara mia waawee bi mi jāmaa wāk'āri, Tachi Ak'ōrepa mi waya k'īra nejasiapiit'ee, parāpa waide k'achia oo amaada-e p'anadairā. Wāara mi jēedariit'ee unuru pirā parādepemaarā ūk'uru at'āri k'īsia k'achia nipapata, k'īra nejasia wēe. ¿Parā at'āri wēraarā ome pariatua k'āi jōni-ek'ā, waide oo amaa k'iniada-e p'anadairā parāpa naawedapema k'achia k'īra t'ādo oopatap'edaa?

13

Pablopa jarada ichia ooit'ee bi Corinto p'uurude

¹ Mia et'ewa jaradak'a nāgí wārupa parā ak'ide wāda ōpee pait'ee. Jāma panak'āri, parā at'āri

k'achiade p'ani pirã, mia ooit'ee Tachi Ak'õre Ūraa chonaarãweda p'ãdade jara bik'a:

'Eperãpa chĩara imiateek'ãri, iru miapii naaweda, irua k'achia ooda unudap'edaarã omé wa õpee jiridaipia bi, auk'a jaradamerã arapa unudap'edaa.' (Dt 19.15)

² Mi parãmaa wãda omeede jaraji chi k'achia oo p'anadap'edaarãmaa mia ãchi chupiria k'awa-e pait'ee, ma k'achia oo amaada-e p'ani pirã, mi pai naaweda. Írá jõmaarãmaa mia jara pëiru wãara ãchi chupiria k'awa-e pait'ee mi jãma panak'ãri.

³ Parãpa k'inia p'anida a p'ani mia ak'ipimerã Cristopa pedepari mi k'ap'ia pari. K'awaadait'ee mi jãma panak'ãri. Cristo eperã juatau wëe bik'a bi-e. Jõma oopari ichia k'inia bik'a, jõmaarã k'ãyaara waibiara bairã. Mãgá auk'a ooit'ee parã t'ãide, k'achia oo amaada-e p'ani pirã.

⁴ Wãara iru juatau wëe pik'a baji kurusode piuk'ãri. Mamĩda írá ichita chok'ai bi Tachi Ak'õrepa iru chok'ai p'irabaipida perã. Tai jida juatau wëe pik'a p'ani. Mamĩda iru ome araa p'anapata perã, ichiaba ichita chok'ai p'anapataadait'ee iru ome. Maperã taipa parã nepira ak'idai irua k'aripak'ãri.

⁵ Pia k'ĩsĩati parã t'ãri chaachaa. ¿Wãara Jesu-cristode ijãpatak'ã? Mãgá ijãa p'ani pirã, k'awa p'ani Cristo bapari parã ome. Mamĩda p'oyaa ooda-e p'ani pirã irua oopi bik'a, wãara iru ba-e parã ome. ¿Wãara-ek'ã?

⁶ Parãpa taipa oopata pia ak'idak'ãri, k'awaadai wãara Cristopa tai pëiji, taipa oopata perã irua oopi bik'a.

⁷ Mamĩda parãpa tai at'ãri ak'ida-e p'ani mĩda Cristopa pëidak'a, taipa it'aa iidimaa p'ani Tachi

Ak'õrepa parã k'aripamerã ne-inaa k'achia oon-aadamerã. Iidida-e irua parã t'ãri p'uapimerã tai juapa. Jĩp'a iidi p'ani parãpa ne-inaa pia oodamerã irua ichideerãmaa oopi k'inia bik'a. Mãga ooruta pĩrã, taipa apida t'ãri p'uapida-e Tachi Ak'õrepa taimaa oopiparik'a.

⁸ Wãara Tachi Ak'õrepa tai pëipari itriadamerã chi p'ek'au k'achia opataarã ijãapataarã t'ãide p'ani. Mamĩda mãgiirãpa Ak'õremaa chupiria iididak'ãri, ma k'achia oo amaa p'ani pĩrã, mãgã itriada-e pait'ee, Ak'õrepa chi chupiria iidirutaarã p'ek'au k'achia wëpapiari perã.

⁹ Tai o-ĩa p'ani Tachi Ak'õrepa tai pëi-e pak'ãri ijãapataarã itriade. Mapa irumaa iidi p'ani parãpa pipiara ijãadamerã mãik'aapa oodamerã Cristopa oopi bik'a.

¹⁰ Ma-it'ee mia na k'art'a parãmaa p'ãji mi wãi naaweda. Mia parã itria k'inia-e bi mãik'aapa apida t'ãri p'uapi k'inia-e bi, Ak'õrepa mimaa mãga oopi bi mĩda. T'ãri p'uapii k'ãyaara, mia parã k'aripa k'inia bi pipiara ijãadamerã. Ma-it'eepi Tachi Ak'õrepa mi parãmaa pëiji.

Pablopa jarada na k'art'a p'ã aupa wãde

¹¹ Irã ipemaarã, na k'art'a aupa k'inia bi. K'inia bi parã o-ĩa p'anapataadamerã mãik'aapa ne-inaa jõmaweda oo k'inia p'anapataadamerã Cristopa oopi bik'a. T'ãri auk'a, k'ãiwee, chik'inia p'anapatáati mia ũraadak'a. Mãgã Tachi Ak'õrepa parã pia ak'it'ee, irua eperãarã k'ãiwee p'anapipari perã mãik'aapa chik'inia p'anapipari perã.

12 Ipemaarã ome chik'inia saludaapatáati parãpa ichita oopatak'a. Nãpema Cristode ijãapataarãpa parãmaa salude pëiruta.

13 Taipa k'inia p'ani Tachi Waibia Jesucristopa parã k'aripamerã. Ichiaba k'inia p'ani Tachi Ak'õrepa parã chik'inia p'anapimerã mãik'aapa Tachi Ak'õre Jaurepa parã jõmaarãmaa k'awapimerã wãara Cristodeerã.

Mãgapai paji.

Tachi ak'õre pedee
New Testament in Epena (CO:sja:Epena)

copyright © 2005 Wycliffe Bible Translators, Inc.

Language: Epena

Translation by: Wycliffe Bible Translators, Inc.

Epena

sja

Colombia

Copyright Information

© 2005, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Epena

© 2005, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

PDF generated using Haiola and XeLaTeX on 18 Apr 2025 from source files dated 29 Jan 2022

1e08d4cb-71aa-5440-b08f-b522fabb6441